

Peqqinnissakkut sullissinernik ussassaarisarneq pillugu Inatsisartut peqqussutaat nr. 8, 31. maj 2001-imeersoq

Kalaallit Nunaanni peqqinnissaqarfik pillugu inatsimmi nr. 369-imi, 6. juni 1991-imeersumi § 1 aamma § 3 naapertorlugit makku aalajangersarneqarput:

Atuuffia

§ 1. Inatsisartut peqqussutaanni peqqinnissaqarfimmi suliassat peqqissaasutut sulinissamut akuerisaasut akuerisaanngitsullu taakkuluunniit sinnerlugit sullissisunit ingerlanneqartut pillugit ussassaarisarneq, matumani tusagassiorfitsigut nalunaaruteqarnerit ilanngullugit, pineqarput. Inatsisartut peqqussutaanni, allatut aalajangiisoqarsimatinnagu, napparsimmavinnut, pisortat peqqinnissakkut suliffeqarfiutaannut allanut, peqqinnissakkullu sullissivinnut namminersortunut, peqqissaasunullu namminersortunut kiisalu atorfeqarfinnut peqqinnissakkut sullissivinnut allanut tunngatillugu ussassaarisarneq pillugu ataatsimut malittarisassat aalajangersarneqarput.

Imm. 2. Atuagassiatigut nalunaaruteqartarnermut atatillugu taamaallaat innuttaasunut kajumissaarinertaqanngitsumik paasissutissiinerit pineqarput.

Imm. 3. Inatsisartut peqqussutaanni isarussanik isinullu igalaasartaasanik ikkuttakkanik ussasaarinerit pineqanngillat.

Imm. 4. Inatsisartut peqqussutaanni peqqinnissakkut sullissineq pillugu pisortani oqartussaasut paasissutissiisarnerat pineqanngilaq.

Imm. 5. Naalackersuisut sullissivii imm. 1-imi pineqartut saniatigut sullissivinnut allanut peqqussutip tamakkiisumik ilaannakortumilluunniit atuunnissaa pillugu aalajangersagaliorsinnaapput.

§ 2. Inatsisartut peqqussutaannissaaq suliffiup ussasaarineri pineqartup Kalaallit Nunaata avataani suliaqarnissaanik siunertalimmik Kalaallit Nunaanni ussasaarutininik saqqummiisarneq pineqarpoq.

Ussasaarutit pillugit malittarisassat

§ 3. Peqqinnissakkut sullissineq pillugu ussasaarineq suliarnut tunngassuteqartuinnarnik, eqqortumik uppernassuseqartunik tamakkiisumillu imaqaassaaq.

Imm. 2. Atuagassiatigut nalunaarutit taamaallaat imarissavaat peqqissaasup aqqa, suliffiup taaguutaa ilanngunneqarsinnaavoq, peqqissaasup sulinermi taaguutaa, najugaa, oqarasuaataata faxiatalu normui, e-mailikkut nassitsivissaaq, qaqugu naapinneqarsinnaasoq, tassani ilanngullugit piffissat sulifiminiittanngiffii, suaassusia qassinillu ukioqarnera, immikkut ilisimasalitutt akuerisaanera, suliffiup innarluutilinnit tikikkuminartuunera, misissuisarfiup innarluutilinnut atortulersugaanera il. il. aammattaaq misissuisarfimmut atasumik innarluutillit biiliinut unittarfeqarnerisooq il. il., kiisalu misissuineri katsorsaanerimilu periaatsit, utaqqisunut piffissaliussat qanorlu akeqartitsineq

Imm. 3. Tusagassiorfitsigut nalunaaruteqarneq fjernsynikkut ingerlanneqassanngilaq.

§ 4. § 3, imm. 2-mi aalajangersakkami peqatigiiffiit kattuffiillu innuttaasunut nalinginnaasumik peqqinnissamut tunngasunik paasissutissiisarneri pineqanngillat.

Imm. 2. Atuagassiatigut nalunaarutit peqqinnissaqarfimmi suliassaqarfiup iluani sulisunut nalunaarutaat § 3, imm. 2-mi aalajangersakkami pineqanngillat.

Nakkutilliineq

§ 5. Peqqinnissaqarfimmik Nakkutillisoqarfik Inatsisartut peqqussutaat manna malillugu ussassaaruteqartarnermiknakkutilliisuvoq.

Imm. 2. Peqqinnissaqarfimmik Nakkutillisoqarfik nakkutilliinermut atatillugu suliaq pillugu isummaminik saqqummiussisinnaavoq imaluunniit § 6, imm. 1 malillugu pineqaatissiisoqarnissaa siunertaralugu sulissuteqarluni aallartisisinnaalluni.

Imm. 3. Naalackersuisut peqqussut manna malillugu ussassaarisarnek pillugu erseqqinnerusunik malittarisassaliorsinnaapput, matumani § 3, imm. 1 aamma 2 kiisalu § 4, imm. 1 aamma 2 ilanngullugit.

Pineqaatissiisuteqartarneq

§ 6. § 3-mi aalajangersakkamik unioqutitsinermi akiliisitaasussanngortitsilluni eqqartuussisoqarsinnaavoq.

Imm. 2. Maleruaqqusani peqqussut manna tunngavigalugu pilersinneqartuni aalajangersakkanik unioqutitsinermi akiliisitaasussanngortitsilluni eqqartuussaasoqarsinnaanera aalajangersarneqarsinnaavoq.

Imm. 3. Aktiaateqarluni ingerlatseqatigiiffik, piginneqataassuteqarluni ingerlatseqatigiiffik, piginneqatigiiffik assigisaaluunniit unioqutitsippat ingerlatseqatigiiffik akiliisitaasussanngorlugu eqqartuunneqarsinnaavoq.

Atuutilersitsineq

§ 7. Inatsisartut peqqussutaat atuutilissaaq ulloq 1. august 2001.

Imm. 2. Nakorsat sulinerat pillugu inatsisip Kalaallit Nunaannut atuutilersinneqarnera pillugu peqqussummi nr. 860-imi, 18. december 1991-imeersumi § 21, imm. 1 aamma § 26, imm. 2 atorunnaarput.

Imm. 3. Kigutit nakorsaat pillugit inatsimmi nr. 276-imi, 26. maj 19976-imeersumi § 16 atorunnaarpoq.

Imm. 4. Kigusiortut kigutilerisinnaasut pillugit inatsimmi nr. 100-mi, 14. marts 1979-imeersumi § 10 atorunnaarpoq.

Jonathan Motzfeldt

/

Alfred Jakobsen